




Socialistas

MOCIÓN QUE PRESENTA O GRUPO MUNICIPAL SOCIALISTA DO CONCELLO DE OROSO PARA RETIRAR A LEI ORGÁNICA 4/2015, DE 30 DE MARZO, DE PROTECCIÓN DE SEGURIDADE CIDADÁ (LEI MORDAZA).

De acordo previsto no Regulamento de Organización, Funcionamento e Réxime Xurídico das Entidades Locais, o Grupo Municipal Socialista do Concello de OROSO desexa someter á consideración do Pleno a seguinte **Moción**.

EXPOSICIÓN DE MOTIVOS

O PP aprobou o pasado 11 de decembro, en solitario, a súa Lei de Seguridade Cidadá coa oposición frontal do PSOE. Trátase dunha "lei mordaza" que rompe o espírito da Constitución e que o PSOE procederá a derrogar en canto regrese ao Goberno. Esta lei non só non contou co respaldo parlamentario dos partidos da oposición senón que foi recorrida ante o Tribunal Constitucional por unha ampla maioría dos mesmos: o PSOE promoveu o recurso de inconstitucionalidade contra a Lei Orgánica 4/2015, de 30 de marzo, de Protección de Seguridade Cidadá, xunto con Esquerda Plural (EU, ICV-EUiA), UPyD, Compromís-Equo, e Coalición Canaria.

Non existe unha demanda social para unha norma absolutamente innecesaria, que supón un recorte de dereitos políticos e civís recollidos na Constitución, polo que o único que busca o Goberno é un retorno ao Estado policial.

Rajoy está a demostrar ser o presidente máis retrógrado da democracia española, está a legislar soamente para a dereita máis extrema e está a aprobar recortes en dereitos e liberdades en cada Consello de Ministros que se celebra.

É evidente que o Goberno ten medo á contestación social, moléstalle e converte á cidadanía que protesta en cidadáns e cidadás baixos sospeita. A lei mordaza é unha lei desmesurada e desproporcionada, tanto polas restricións que contempla como polo agravamento das contías das multas. Busca castigar máis ofrecendo menos garantías xurídicas á cidadanía.



Con esta lei, por citar varios exemplos, poderase castigar con até 30.000 euros unha manifestación para impedir un desafiuzamento ou con até 600 euros as faltas leves, que son as máis comúns. Poderase multar a quen difunda imaxes de antidisturbios golpeando sen necesidade a manifestantes, ou considerar unha ameaza á seguridade cidadá negarse a mostrar o DNI. Ademais, aqueles que participen nunha manifestación espontánea, isto é, non notificada previamente á Delegación do Goberno -cosa que ocorre no 50% das protestas- poderán ser tamén multados.

Ao Goberno do PP moléstalle a xente na rúa, pero o problema non son os cidadáns e cidadás que critican a acción do Goberno e as súas políticas antisociais. Se á dereita gobernante quere frear as protestas sociais que tanto lles perturban, o que debe facer é rectificar a súa política económica e botar freo á desigualdade, pero non arremeter contra o cidadán que protesta na rúa. Con esta lei, o PP demostra que non acepta o dereito á queixa e á discrepancia.

É evidente que coa escusa da crise, o PP recortou os dereitos sociais. Agora, coa escusa da seguridade, busca limitar as liberdades políticas e civís. Un novo recorte de dereitos que se suma aos xa perpetrados durante estes tres anos do PP en educación, sanidade, dereitos laborais, xustiza.

Os socialistas seguiremos traballando para preservar a cohesión social, a liberdade e a igualdade de oportunidades de toda a cidadanía, impulsando desde os municipios as prestacións necesarias de servizos sociais e promovendo a reinserción social das persoas en situación de maior vulnerabilidade. Medidas de prevención, que, desde as entidades locais, poden asegurar o desexable benestar da nosa cidadanía e os seus dereitos e liberdades, axudando a "minimizar" o efecto da mal chamada Lei de Protección de Seguridade Cidadá.

Por estas razóns pretendemos que o PP retire a "lei mordaza", porque lima a cohesión social, cuestiona frontalmente o Estado de Dereito e limita os dereitos e as liberdades de cidadanía que conquistamos nestes anos de democracia desde que se aprobou a Constitución no ano 1978.



Socialistas

Por todo iso, o Grupo Municipal Socialista no Concello de Oroso somete a votación a seguinte **MOCIÓN** para ser aprobada e na que se insta ao Goberno de España a:

Retirar a Lei Orgánica 4/2015, de 30 de marzo, de Protección de Seguridade Cidadá (Lei Mordaza) porque restrinxe indebidamente o exercicio dos dereitos e as liberdades da nosa cidadanía e representa un ataque frontal ao noso Estado de Dereito.

29 de xullo de 2015

Asdo.: Antonio Leira Piñeiro
Voceiro/Portavoz Grupo Municipal Socialista

**SR. ALCALDE - PRESIDENTE DA CORPORACIÓN MUNICIPAL DO
CONCELLO DE OROSO**